

曾文正公奏稿

曾文正公奏稿

卷之三十二目錄

陳明天旱水涸及東西兩路軍情片

同治六年五月十五日

謝授大學士 恩摺

六月初十日

江甯昭忠祠合祀楚軍水陸營官片

七月二十九日

霆軍分別撤畱婁雲慶另募新軍摺

全日

籌撥直隸安徽協款試辦導淮摺

十一月初三日

李朝斌本姓王氏請仍歸李氏片

十二月初三日

籌辦本年江北新漕摺

全日

江甯建立軍營官紳昭忠祠摺

擬補長江水師各缺續陳未盡事宜摺

同治七年三月初五日

陸營借補小缺請飭部核議片

六年江北冬漕併歸海運詳議章程摺

全日

擬赴上海查閱鐵廠片

四月初七日

遵旨酌提制錢解津摺

閏四月十四日

直隸陝甘協餉分別籌辦摺

全日

催劉銘傳赴營密片

謝授武英殿大學士

恩摺

五月初八日

預籌撤勇經費摺

七月二十二日

查明運河水誌情形摺

全日

陳明天旱水涸及東西兩路軍情片

同治六年五月十五

再任賴逆股自鄂省出竄現在擾至葉裕許州一帶已有東趨之勢山東防務以運河爲最要去年逆蹤三次竄撲均經苦戰擊退固由防務之嚴密亦恃水勢爲屏蔽本年天氣亢旱河水乾涸臣率屬步禱已逾兩旬雖於四月二十四日五月初三初十日得雨三次均未霑足農田枯坼禾稻不能栽插鹽河無水鹽斤不能出場遠近祈禱人心皇皇皆由微臣位高德薄上干天和累及斯民憂愧無地徧詢各處湖南江西浙江等省及蘇松徽甯等府已得透雨安廬鳳潁淮揚江鎮等府及鄰省湖北均未得沛甘霖若過夏至不雨則旱災已成不特民食軍餉兩

無所出且恐飢民流而爲寇軍務愈形棘手目前運河日涸水  
師無可展施旱兵尙嫌單薄賊如悉數猛撲恐上年之濬河修  
牆前功盡棄此東路軍情之可慮也至陝西張逆一股屢經劉  
松山擊敗逆燄漸衰聞有回竄出關之意如又竄至豫鄂應請  
旨敕下李鴻章仍檄劉松山追賊東還不宜久留秦中一則道  
途太遠糧餉難運一則該軍與捻逆接仗已多深悉賊中伎倆  
應令各軍全力合謀先保中原腹地臣治捻無功抱愧莫釋天  
時人事交惕於中苟有所見不敢不據實上陳伏乞

皇太后

皇上聖鑒訓示謹

奏

謝授大學士 恩摺 同治六年六月初十日

奏爲恭謝

天恩仰祈

聖鑒事竊臣接准吏部咨開同治六年五月初九日內閣奉

上諭曾國藩著補授大學士仍留兩江總督之任欽此當卽恭設香案望

闕叩頭謝

恩訖伏念臣材識疎庸班資尙淺謬點參知之位久懷覆餗之

虞比以勦捻無功回居本任尤抱慙於衾影若冒涉於冰淵茲乃欽奉

恩綸晉階端揆處人臣之極地爲稽古之至榮當此時事多艱  
討賊無效旣幸寬於譴責反洊晉乎台司

恩遇彌隆悚惶何極

臣

自回江南倏逾三月精力日減舊病未

痊文牘憚於詳求賓僚艱於接見不特軍國大計無補絲毫卽  
論吏事之多疎已覺斯職之不稱五月初間本擬具疏陳情讓  
賢避位時以亢旱爲災民心惶懼今則羣賊東竄軍事方殷自  
當補救乎艱虞未敢輕言乎進退赧顏而拜

新命撫躬而省舊愆惟有勉竭愚誠強扶衰疾更集思而廣益  
冀補過而盡忠或以仰答

高厚鴻慈於萬一所有

微臣

感激下忱謹繕摺叩謝



天恩伏乞

皇太后

皇上聖鑒謹

奏

江甯昭忠祠合祀楚軍水陸營官片

同治六年六月初十日

再江甯省城建立昭忠祠請祀湘軍陣亡各員并臣於同治三年十月二十二日具奏欽奉

諭旨允准在案當建祠之始係在金陵初克之時就僞王府略加修葺專祀圍攻金陵之陸軍將士計陣亡病故不下二萬四  
五千人未能推及水師亦因水師昭忠祠先於咸豐八年奏建  
於湖口縣之石鐘山已足以妥忠魂不必更以金陵專祠爲重  
也惟論金陵克復之功實賴水師肅清江面斷絕賊糧上游三  
千里濱江城隘皆由水軍苦戰得來最後九洑洲一役戰功尤  
偉死事更多而江甯昭忠祠僅及陸師未列水師究不足以彰

公道現擬略易規模重加釐訂其陸軍哨勇之祀祀者業於同治三年徧立神牌應卽仍如其舊惟將祠內正屋改造一層並祀水陸之統領營官庶幾於理至順於心始安相應奏明請旨准將江甯昭忠祠台祀楚軍水陸各營仍飭地方官一併春秋致祭在

國恩尤爲公溥而眾心亦皆允愜理合會同兵部侍郎臣彭玉麟附片具陳伏乞

皇太后

皇上聖鑒訓示謹

奏

霆軍分別撤留婁雲慶另募新軍摺

同治六年七月二十九日

奏爲霆字全軍分別撤留並檄婁雲慶另募新軍以備防剿恭摺仰祈

聖鑒事竊提督鮑超回籍養病臣於六月初十日具奏旋奉六月十八日

寄諭曾國藩奏鮑超傷病深重懇准回籍一摺本日已明降諭旨允准其所部各營並令婁雲慶接統矣該提督馬步各營人數太雜紀律未嚴應如何嚴加裁汰分別撤留之處著曾國藩李鴻章悉心籌商著責成婁雲慶嚴加整頓毋貽他患等因欽此查霆軍步隊二十營馬隊十二營自鮑超患病後暫交前宣

化鎮總兵宋國永代統數月頗稱安靜而宋國永秉性謹慎偏於慈柔又鑑於昔年金口之變屢次來稟不敢接統臣奏調正定鎮總兵婁雲慶統轄該軍而霆軍各將領又畏婁雲慶之嚴明公稟不願隸其部下五月之季婁雲慶自直隸馳至金陵臣與之商酌該鎮亦以霆軍人數太多彈壓匪易各將領共事已久勢分本相等夷雖公稟不過出於一二人之私意而情誼既有未孚臨急必難得力不敢冒昧接統臣又與李鴻章及湖北督撫兩臣往返函商僉謂代統全軍固難其人分統各支亦非長策遂定分別撤留之議霆軍之制步隊每營六百人馬隊每營二百四十人步隊苦戰多年爲賊所憚馬隊募練未久尙無

威名於是酌定先撥馬隊十二營步隊六營尙留步隊十四營  
舊日<sub>臣</sub>勇國羣主持調度仍令宋國永駐營照料一面卽令裴  
雲慶馳赴安陸府另招步隊九營俾已撤者可應新營之募新  
招者仍係慣戰之兵由<sub>臣</sub>分別檄行去後正在籌辦間續奉六  
月二十一日

寄諭譚廷襄奏此軍人數較眾內多降勇一議遣撤勢必藉端  
索餉枝節橫生祇可議分不可議撤等語所奏不爲無見著曾  
國藩李鴻章設法籌辦總期駕馭得宜毋滋事端等因欽此<sub>臣</sub>  
早夜籌思亦嘗深慮及此故不敢以未定之事遽行入告仰煩  
宸念茲據宋國永馳報於七月初一日起至初四日止先遣步

隊六營次遣馬隊十二營籌給口糧收回器械各弁勇悉遵約  
東並無浮言間有不法之勇欲肆煽惑立即查獲正法其遣撤  
之勇有回籍歸農者有至婁雲慶新營應募者各聽其便遣散  
時既已安靜則沿途必不至另滋事端宋國永辦理此事極爲  
妥協所留之十四營現仍駐紮襄陽之八條岡該軍若防堵鄂  
境必可得力若令征剿外省則宋國永久勞之身苦求卸肩  
亦慮其過於慈柔難勝重任容當續爲籌商奏明辦理其霆營  
馬隊既撤之後內記名提督譚勝達唐仁廉曹志忠等均係著  
名驍將臣令其酌帶鞍馬另募北人附入淮軍步隊之中會同  
剿賊現經李瀚章等檄令挑選精騎一千匹帶赴濟甯歸李鴻

章請遣大約馬隊雖撤仍須就現有馬匹補招足額不過裁減  
南勇多換北人改霆軍之名目就淮勇之範圍以便會剿一路  
耳至婁雲慶新招之營已據稟報於六月二十八日前赴安陸  
府開招將來募練成軍飭駐何處防剿宋國永既不能遠征或  
將其部下各營酌量撥歸婁部統轄均俟另案陳奏所有霆軍  
分別撤留並檄婁雲慶另募新軍緣由恭摺由驛四百里馳奏  
伏乞

皇太后

皇上聖鑒訓示謹

奏



籌撥直隸安徽協款試辦導准摺同治六年七月二十九

奏爲遵

旨籌撥直隸安徽協款並另行籌款試辦修復淮濱事宜恭摺  
仰祈

聖鑒事竊准部咨覆奏候補四品京堂彭祖賢奏旱災較重請  
籌賑濟一摺議提江蘇釐金銀二十萬兩解京支放等因同治  
六年五月二十六日具奏奉

旨依議欽此又准軍機大臣字寄同治六年七月初三日奉

上諭江海關應協皖餉前經部議照常撥解現在皖軍出境防  
堵需用甚亟著曾國藩郭柏蔭迅爲按月籌撥等因欽此臣查

直隸賑銀院省協餉均屬必不可緩之事而此二事之外尙有  
爲時較緩而需款尤鉅之事本年二月閒淮揚紳士公稟請復  
淮水故道臣以費用須百餘萬金無款可籌不敢批准而念上  
年清水潭之變官帑之用出及少征者已逾百萬民間所失之  
數尙不止此目覩淮揚民困又復不忍批駁遲之數月始議定  
撥銀試辦以上三端共需銀數十萬兩目下江蘇之全力皆以  
供勦捻之緊餉實有不敷周轉之勢請爲

皇太后

皇上粗陳其略卽如直隸賑銀一項部咨指令於釐捐項下籌  
撥查江蘇釐捐共分三處一爲江北釐金除指供甘餉每月三

萬外并無盈餘一爲蘇州釐局一爲松滬釐局除認供淮軍巨  
餉外尙有淮揚太湖兩支水師月餉撫標兵丁額餉織造大運  
等項皆於釐局取之此外入款又有鹽釐茶釐關稅三宗出款  
又有陝西湘軍之餉湖北霆軍之餉漕臣月協之餉車駝轉運  
之費製造軍火之費近日師集膠萊又添米糧海運之費款目  
浩繁支應絡繹以入抵出本年尙短銀七十萬以外斷無餘力  
分撥他處惟直隸爲根本重地無論如何爲難必應設法籌濟  
臣現飭令蘇州布政司丁日昌於地丁項下籌銀六萬兩分批  
解京以供支放此外實難再撥仰求

聖慈曲賜體諒安徽協餉一項自部定江海關協銀二萬兩後

以無款可撥從未起解喬松年在安徽巡撫任內皖營十分支  
絀而未經奏催江海關一款卽英翰上年請留丁漕摺內歷數  
各省協餉亦未議及此款皆深知關稅短絀無可勻撥也目前  
英翰出省防勦需餉尤亟奏催海關協餉自係萬不得已之舉  
臣亦諒其苦衷當英翰未催關稅之先臣於六月就准軍月餉  
項下騰出銀一萬兩解皖濟用七月又籌濟銀一萬兩解交宿  
遷行營此後八九兩月尙擬籌濟二萬兩共湊四萬兩以助皖  
軍要需八月以後英翰奏留之丁漕三萬必可按月提用不至  
十分支絀江海關之常稅洋稅入款戶部及總理衙門皆有案  
可稽所有月撥皖餉二萬無以應之擬請

旨卽行停止以歸核實江皖皆臣轄境斷無膜視之理今年除四萬兩外如力能再撥少許不必指定何款臣當與英翰熟商辦理至興復淮水故道一事金明昌年間黃河奪淮瀆之道自是七百餘載水患頻仍咸豐初年黃河北徙軍事方殷未暇導淮水之故瀆并未暇修運河之長堤上年清水潭隄決爲害甚大此外可決之處尙多淮水之患無已雖復瀆之大利不敢必其遽興然淮揚之大害不可不思稍減減害之法不外分淮流以入故道或從成子河分淮以出桃源或從張福口分淮以出清口總須興工以減運河之漲擬本年撥銀十萬兩在雲梯關以下試辦挑濬并於清江設立導淮局從容籌議不求速效但

求實際此事辦成與否未敢預必而爲糜餉之一大宗不敢不預行陳明上瀆

宸聽並將公呈一件章程十六條有利無害論一篇及臣批答一件彙錄咨送軍機處以備查核臣素不善籌餉江南財賦之邦又斷不能求助於外省計今歲湘淮各軍之餉本短銀七十萬加以直隸賑濟及協皖導淮三事又增二十萬均屬無款可指俟冬間設法籌措再行具奏導淮大工如果興辦需銀百數十萬尤屬無款可指俟明年設法籌措再行陸續陳奏所有遵旨籌撥直隸安徽協款及試辦興復淮瀆緣由謹會同漕運總督臣張之萬署江蘇巡撫臣郭柏蔭恭摺馳陳伏乞

皇太后

皇上聖鑒訓示謹

奏

李朝斌本姓王氏請仍歸李氏片

同治六年十一月初三

再江南提督李朝斌本姓王氏襁褓中爲李氏父母撫養鞠育  
至於成立迭遭艱虞王氏本生父母隔絕不相聞問李朝斌初  
不自知爲王氏所生也本年三月間有善化人王正儒來處  
稟稱李朝斌係所生季子自幼育於李氏請飭復姓歸宗等語  
臣當卽詢之李朝斌究竟是否有因李朝斌茫然不解卽寄書  
至家詢其族叔李傳誠等始據詳告顛末蓋李朝斌未生以前  
王氏本生父母已有子三人世俗之見以多子爲累王正儒與  
李朝斌之父相識故指腹訂定墮地後卽任聽李氏攜去王氏  
父母固已棄之如遺矣事隔四十三年忽有呈請復姓之議李



氏族人謂王氏恩誼已斷寄書詳論極陳不應歸宗之義其言亦頗中肯臣復加查核此事關係綱常名義未可憑空臆斷查本朝言禮之書尙書秦蕙田所纂五禮通考最爲精核其於異姓爲後之事反覆辯論一以原情爲主所引金史張詩一事訪本李氏子育於張氏閱三十年始知之初議歸宗終以張氏無子遂仍其舊秦蕙田稱張詩爲孝今王氏本生之父母有子三人而李氏撫養之父母別無主後正與張詩之事相類伏查定例出嗣之子歸宗亦以所後父母有無子嗣爲斷若令李朝斌歸宗則在王氏本生之父母不過於三子之外又增一子而在李氏撫養之父母竟至斬焉不祀撫子者將抱恫於九泉爲子

者將難安於畢世核諸古禮參以今律李朝斌應於李氏別爲一宗但後其撫育之父母而不祭其以上之祖宗於王氏則不通昏姻一以報顧復之深恩一以別族屬之大義其於王氏之父母則曲盡敬養庶爲兩全之道該提督天性肫摯未忍自決臣爲之參酌定議詳晰批示徧告宗人情義既可兼盡眾論亦已僉同惟以提督大員異姓爲後必應奏明立案以昭鄭重而垂久遠用敢詳陳本末上達

宸聰伏乞

皇太后

皇上聖鑒訓示謹

奏

籌辦本年江北新漕摺

同治六年十二月初三日

奏爲查明本年江北新漕徵解實數現在籌辦情形恭摺具奏  
仰祈

聖鑒事

臣

承准軍機大臣字寄同治六年九月十四日奉

上諭戶部奏來歲海運河運新漕請飭各省力籌足額提前趕辦一摺江北漕糧仍當遵照成規妥速兌運等因欽此遵經轉飭江甯藩司會同江安糧道妥速籌辦茲據會詳前來查江北漕糧自咸豐三年後概徵折色截留充餉同治四年揚防凱撤是年冬漕各州縣仍每石折解銀二兩四錢經前署督臣李鴻章等奏明民折官辦以漕米四萬石試行河運尙餘米三萬餘

石照部定變價每石解銀一兩四錢節存銀一兩貼補河運之費五年冬漕因高郵漫口僅徵揚通等府所屬熟田漕米一萬四千餘石奏准全數截留撥補江南各標營兵米此軍興以來江北歷年冬漕徵解之章程也本年春夏苦旱秋後西水盛漲補種之晚稻又被水淹現據勘定歉收分數除徐州府屬變價解充徐台軍餉海州等七屬向徵折色外統計淮揚通三屬應徵熟田起運漕糧正改兌正耗米六萬九千六百八十餘石內應請截留撥補災缺綠營兵米九千四百石有奇實應起運本色米六萬二百石有奇其截留之米同日另片具奏此本年起運正漕之實數也現當京倉匱乏民間維正之供自應飭解本

色第江北折徵已久民間完納稱便且各州縣廢倉未修收米無處儲積祇可仍按折價徵收現飭各州縣酌減收米之價以恤民艱並准各州縣將應解漕米變價每石減銀三錢實解銀二兩一錢仍由官買米辦運盈餘之款卽作運米之資此本年徵解之情形也查起運通倉米石自漕船停廢以後驟難重整舊章部臣力籌河運事宜原圖規復全漕大局無如黃水穿運如張秋南壩頭等處節節淺阻逐段加挑而淤墊太甚仍盼大雨盛漲始得通行然同治三年雖得長運抵通而原船不能回空船戶拆賣板料怨譁滋多同治四年不能長運抵通另於臨清一帶換船剝送計運漕及盤剝等項每石約合銀三兩七八

錢山東挑河之需猶不在內本年江北六萬石之米爲數無多實不敢再爲試行耗費巨款臣等督飭司道再四熟商不如仿照蘇浙章程併歸海運在江北雖屬創舉然較之河運之費所省正復不少現查上海沙船衛船甚少不敷蘇屬運米之用須待來年三月頭批回空方得裝運江北之米上屆江北河運係至次年五月始得北行如用上海頭批回空之船不過旬日抵津似較河運猶爲迅速惟春令米價必增各屬折價一時不能解到現飭司道庫先行籌墊遴委妥員分赴產米地方趕緊採買設法存儲俟明年三月蘇屬海運沙船回空卽將前項漕米六萬二百石零全數海運屆時萬一沙船太少尙可雇用夾板

裝載倘或別有窒礙無船可用仍可將所買之米變價解京不致延誤所有籌辦本年江北新漕緣由謹會同漕運總督臣張之萬署江蘇巡撫臣郭柏蔭恭摺陳奏伏乞

皇太后

皇上聖鑒訓示謹

奏



江甯建立軍營官紳昭忠祠摺

同治六年十二月初三日

奏爲江甯城內建立軍營官紳昭忠祠恭摺仰祈

聖鑒事竊臣於同治三年十月二十二日奏請於江甯省城建

立昭忠祠專祀湘軍陸師陣亡各員弁嗣於本年六月初十日  
奏請增祀水師陣亡各員弁均經奉

旨允准在案惟江甯自咸豐三年淪陷向榮和春等駐兵八載  
陣亡之文武將弁殉難之官紳士民爲數極多尙未建祠崇祀  
實爲闕典前准禮部咨稱同治五年五月十六日奉

上諭御史朱鎮奏請飭查殉難官紳建立專祠等語咸豐三年  
間粵逆竄擾江甯省城所有殉難之將軍祥厚等及紳士曹森

等或臨陣捐軀或積勞病故均堪憫惻著准其在江甯省城建  
立忠義專祠卽著李鴻章將江甯前後殉難各官紳詳細查明  
一併附祀其迭次殉難之民婦著該署督查明一併奏請建祠  
以表忠盡而彰節烈欽此

臣李鴻章遵

旨飭派委員於城東

關帝廟左側建立一祠甫經落成未遑經理卽已督師北征臣  
回任之後親往查驗見其地隘宇卑規制多闕祠中未立栗主  
婦女別無設位之處寸心慙焉不安旋值秋祭之時勘得湘軍  
昭忠祠在城北蓮花第五橋係克城之初就僞王府略加修葺  
者工程雖稍簡陋地基極爲寬宏因與僚屬集議就該處並建

三祠中間仍爲湘軍陸師昭忠祠但拆其朽者改建後棟兩廡東邊新建金陵軍營官紳昭忠祠西邊新建湘軍水師昭忠祠俾各省各軍前後抗志捐軀者忠魂毅魄萃於一處官旣免於分祭民亦便於觀瞻始覺理得而心安其三祠應祀人數中祠原祀湘軍陸師將士甲子冬閒已查明一萬二千餘人各立神牌應仍其舊西祠祀湘軍水師將士因先於咸豐八年奏准在江西湖口縣之石鐘山建有總祠設立木主此閒僅祀水師營官及九洑洲殉難之員爲數較少查辦較易惟東邊一祠應祀之人最多稽查之事最難綜舉大綱約有六端一曰咸豐三年金陵城陷滿漢文武殉難之員二曰自癸丑至庚申八載向榮

和春營中陣亡傷亡及病故之員三曰江甯七屬歷年殉難之  
紳及外籍而寓居金陵遇害之紳本籍而陣亡於外省之紳四  
曰生平久居金陵大營其後盡節他處如鄧紹良周天受張玉  
良之類五曰揚州鎮江兩軍皆因圖克金陵而設兩處陣亡傷  
亡病故之員亦應附祀省城祠中六曰金陵滿漢婦女不屈而  
死者應別立貞烈祠祀之臣現派道員杜文瀾楊鍾琛朱履恒  
查此六色人等詳考事實書立神牌同享明禋期無遺漏派道  
員桂嵩慶鳩工庀材悉求堅實約計明年二月祠工可以蒞事  
合無仰懇

天恩明降

諭旨准立金陵軍營官紳昭忠祠飭令地方官春秋致祭前奉  
准建湘軍陸師昭忠祠

上諭一道臣曾敬謹繕寫伐石樹碑此次欽奉  
諭旨亦擬恭錄勒石庶使雙碑並峙千古不刊

聖謨與日月同昭臣節偕山河並壯於

熙朝褒忠勸善之道不無裨補所有建立軍營官紳昭忠祠緣  
由謹繕摺具陳伏乞

皇太后

皇上聖鑒訓示謹

奏

擬補長江水師各缺續陳未盡事宜摺

同治七年三月初五日

奏爲擬補長江水師各缺並續陳未盡事宜恭摺仰祈

聖鑒事竊長江水師營制事宜臣等會同定議於同治四年十

二月二十八日具奏欽奉

諭旨敕下軍機大臣會同該衙門妥議具奏嗣於五年八月初七日准兵部咨開逐條會議具奏奉

旨允准又於六年十一月初十日接准兵部咨催長江所設各缺均未奏補有人飭令迅速揀員請補以專責成而符定制等因先後行文到臣查各路水師以臣玉麟所部內江水師及前陝甘督臣楊岳斌所部外江水師閱時最久人數最多楊岳斌

赴陝甘之任將水軍調改陸路者居其大半留江人員爲數已減此外又有黃翼升所部淮揚水師李朝斌所部太湖水師而江西湖南湖北三省水師中亦各有資格較深功績較著之員臣等公同商酌以各軍立營之先後分此次得缺之多寡遵照奏定章程以大銜借補小缺各加遴選開單咨送臣國藩臣玉麟復加稽核其岳州漢陽湖口瓜洲四鎮總兵擇其勞績最著足膺闡寄者擬定四員請

旨簡放其副參游三項營官二十四缺都守千把外委七百七十四缺擬定員名分析開單恭呈

御覽伏查定例武職自守備以上選補各缺均須引

見補授此次設立長江水師百事創始分防汛地嚴定營規雖以久募之勇改爲經制之兵似若易於就緒而裁撤各軍以此營而歸併彼營配補各缺以江境而互調楚境實覺頭緒繁多非數月半年所能定局相應奏明請

旨暫緩引

見敕部先行頒給劄付以昭信守仍俟立營停妥各歸本汛後由部中分年分起調取引

見乃可從容料理原奏所議事宜三十條經部臣核復允行立法已屬周密惟創立水師造端宏大不厭詳求茲將未盡事宜續議十條另開清單恭求



訓誨溯查咸豐三年衡州試辦水師之始初非有舊例之可循亦非能一辦而卽妥大抵屢試屢變漸推漸廣前月所立之法後月覺其不備而又增之今歲所行之事明歲覺其不便而又改之卽如因船中無主而始設哨官因棲止不便而始加雨篷因巨艇不甚靈活而全用舢板因弁勇不可陸居而另給座船若此之類皆履之而後知試之而後改逮規模之粗定遂習慣而成常新舊所擬事宜四十條皆就習慣者而著爲令典在目下已不敢謂立法之善將來時移事異更恐有窒礙難行之處且法待人而後舉苟非其人則雖前賢良法猶或易啓弊端況臣等才智短淺創議新章深慮弊竇之叢生致煩後人之譏議

夙夜兢兢不勝祇懼所願數十年後濱江之督撫提鎮隨時損益以補今日之闕疎遇事講求以冀將材之輩出庶幾有舉不廢歷久常新則臣等所禱祀以求者也其請鑄關防清單請裁各缺清單一併開列恭呈

御覽請

旨敕下各衙門議覆施行所有擬補長江水師各缺並續陳未盡事宜緣由謹會同湖廣總督臣李鴻章漕運總督臣張之萬江蘇巡撫臣丁日昌署安徽巡撫臣吳坤修江西巡撫臣劉坤一護理湖北巡撫臣何璟湖南巡撫臣劉崐長江提督臣黃翼升恭摺具

奏伏乞

皇太后

皇上聖鑒訓示謹

奏

謹將長江水師前奏未盡事宜續行定擬開單恭呈御覽

第一條頒發關防條記

一請鑄關防於官銜上均冠長江水師字樣如四鎮總兵岳州鎮曰長江水師岳州鎮總兵官關防漢陽鎮曰長江水師漢陽鎮總兵官關防湖口鎮曰長江水師湖口鎮總兵官關防瓜洲鎮曰長江水師瓜洲鎮總兵官關防狼山鎮仍循其舊副參游都守等官請鑄關防條記字樣另開詳細清單進呈

御覽各營均用本汛地之名如荊州則曰荊州營陸溪口則曰陸溪營皆就府縣口岸之名以爲營名其草鞋夾地名太俗改

名曰金陵營惟提標中營不刻汛地之名至前奏所擬之綏通營綏海營茲亦改名曰通州營海門營使人易曉其千把外委等官卽由外刊刻鈐記以昭信守

### 第二條酌留釐卡充餉

一原奏第十六條內戶部議酌留沿江釐卡供給水師製造軍火器械船礮以各處商貨暢滯時地不同經收數目難以懸定多則中飽少則貽誤餉需不可不預杜其弊應如何酌盈劑虛俾垂久遠妥籌章程奏明辦理等因臣等查長江水師兼轄五省所需餉項合之則見多分之則見少應於五省各留釐卡一處湖南卽留岳州一卡湖北卽留漢口一卡江西卽留湖口一

卡安徽卽留大通一卡江蘇卽留瓜洲一卡岳州漢口兩卡所  
收之釐每年每卡各提十餘萬兩解交湖北鹽道衙門供支水  
師之用其餘入款仍歸兩湖藩司收用湖口大通瓜洲三卡所  
收之釐每年每卡各提十餘萬兩解交江甯鹽道衙門供支水  
師之用其餘入款仍歸三江藩司收用歸水師用者由江楚總  
督報銷歸藩司用者由該省巡撫報銷俟水勇裁撤完畢經制  
水師立定之後此五處卡員卽由江鄂兩鹽道會同該省藩司  
委員經收自此五卡之外各省釐卡俟軍務大定本應全行裁  
撤倘有願留一二卡添補永遠經費者由各督撫體察專案奏  
辦

第三條裁撤水勇日期

一原奏第二十三條內戶部議江南軍務大定所有各營勇丁自當陸續遣撤酌留水勇改爲經制水師應令將遣撤勇丁數目何時撤盡糧額何時起支一併奏報等因臣等查長江水勇向分內江外江兩軍除留補缺額外所有內江一軍水勇已經臣彭玉麟陸續遣撤其數目業經咨報兵部在案其外江水勇此次奏定補缺一案即將勇目次第裁撤俟撤盡再行咨報此外尙有淮揚水勇一軍太湖水勇一軍原議第五條內另設淮揚經制水師太湖經制水師現已將大概規模議定臣國藩擬於一兩月內會奏定案俟經制水兵之案奏定後即將淮揚水

勇太湖水勇遣撤陸續具報

第四條派船巡查私鹽

一原奏第二十七條內戶部議礮船爲長江利器以之巡緝私鹽固最便利而包庇私鹽實難稽查若不嚴定章程將來弊竇叢生鹺政因此而壞營制卽因此而弛關係實大應令提督會同江楚總督公同遴選師船奏派若干隻另立旗幟字號仍令兩淮鹽運使及湖北鹽道會同各營嚴密查訪其未經奏派之哨船不准干預鹽務如有包庇私鹽官則參辦兵則比照尋常私梟加等治罪其如何明定官兵處分罪名應令悉心酌擬奏明定案等因查前奏由漢陽瓜洲兩鎮標派船巡緝私鹽茲定



瓜洲鎮派巡鹽船三號一年一換歸運司暨瓜棧委員稽查其  
餉卽由瓜棧支發漢陽鎮派巡鹽船三號一年一換歸湖北鹽  
道暨督銷局稽查其餉卽由督銷局支發所巡不過上下四十  
里不准太遠以防流弊此外戰船一概不准干預鹽務至弁兵  
包庇私鹽或失察或知情或受賄或通同興販各有本例將來  
應按照情節問擬毋庸另立處分罪名轉啓遷避之漸

第五條酌定礮械旗幟

一原奏第七條內工部議戰船應配旗幟礮位等項應令查明  
各船應配何項礮位旗幟器械若干卽將名目件數造冊送部  
查核等因查長龍戰船頭礮二位係洋庄各重八百斤一千斤

不等邊礮四位洋庄各重七百斤梢礮一位洋庄重七百斤舢  
板戰船頭礮一位洋庄重七百斤八百斤不等梢礮一位洋庄  
重六百斤七百斤不等兩邊轉珠小礮二位重四五十斤不等  
此外洋鎗鳥鎗刀矛之類隨宜分配至戰船旗幟悉以桅旗並  
梢旗爲主凡桅上用方旗長龍船桅旗長一丈二尺寬七尺舢  
板戰船桅旗長九尺寬六尺上半節俱用紅色下半節俱用白  
色或畫北斗或畫太極圖或畫如意之類提鎮各標各畫一樣  
以示區別船梢用尖角旗長龍梢旗長一丈一尺寬九尺舢板  
梢旗長九尺寬七尺均寫明某標某營某哨字樣此外各標各  
營哨或桅上添一小旗或船頭設一立旗或寫姓號爲記顏色

制度各聽其便

第六條更換額缺官階

一岳州漢陽湖口瓜洲四鎮中軍游擊營制惟岳州漢陽兩鎮用船三十三號其湖口瓜洲兩鎮中軍僅用船二十三號該兩營地當衝要不敷分布瓜洲又有應派巡鹽之船尤嫌其少查原奏第七條長江提鎮例給坐船外各給督陣舢板二號以守備爲哨官本應設立守備十二缺茲將此十二缺裁去撥六缺歸湖口中軍營撥六缺歸瓜洲中軍營改爲守備各一缺干總各二缺把總各三缺各成十二缺之數與原奏七百七十四哨總數相符而四鎮中軍船數亦不致多寡懸殊所有提鎮督陣

舢板之兵丁由中軍派員管轄

第七條議裁舊日額缺

一原奏第二十九條京口狼山湖口漢陽岳州等營凡向有水師之名而無礮船之實者今各該處均立標營應改從新章悉歸長江水師提督節制以昭畫一其向無水師名目者不必更改等語查原議之意濱江舊設之水師仍不裁革不過改歸長江提督節制而已近來細加講求舊營斷不能與新營相合舊制雖名水師而無船無礮官員各有衙署新章則水師專以船礮爲主自都司以下卽無衙署以船隻爲辦公之所舊制水兵口糧不過月支一兩至二兩爲止新章則水兵口糧月支二兩

七錢而官員之俸薪養廉船價亦與舊制迥別舊營水兵不習使船放礮等事新章則專重使船放礮若將舊營與新營並存則規制懸殊必生缺望若令舊官補新營之缺則舟居不慣必難得力再四籌思迄無善策惟有將濱江舊日水師酌量裁去如湖北原設之荊州參將營漢陽副將營湖南原設之洞庭水師營岳州水師營江西原設之鄱湖南湖九江水師營均應裁去所裁之缺副將參將游擊都司等均請兵部另行調補陸營實缺守備千把外委等均由該省督撫另行調補陸營實缺其未經調補以前仍在原省支食本缺廉俸其兵丁則竟行裁去無庸另募茲將應裁各缺開單進呈

御覽至長江水師西至荊州爲止其自荊州以上泝江至宜昌巴東原奏事宜第五條聲明另由湖北設防所有宜昌鎮標水師三營應仍其舊但歸湖北督撫提督統轄不歸長江提督節制又如江南舊有京口水師副將三營及狼山以東各水師舊營現議將江蘇水師認真整理或裁或改由臣國藩另案奏辦

### 第八條各省督撫節制

一長江水師雖以提督爲主而在五省境內應各歸五省督撫節制調遣副參游以下歸本境巡撫節制總兵並歸總督節制卽以湖南而論去太平府提督衙門甚遠若該省有土匪竊發須用戰船剿辦者卽由湖南巡撫檄調境內水師往剿岳州鎮

總兵接到咨檄立即發兵不可等候長江提督回文致誤軍機  
湖北江西蘇皖四省巡撫皆然至總督調度轄境水營尤屬通  
行之舊例平日無事之際督撫偶調水營操演一接檄文立即  
前往應操不可藉口等候長江提督回文致誤操期蓋立法雖  
密設或長江提督不得其人則法皆不行口糧既恐虛糜船礮  
亦恐廢壞若督撫中有一省認真者則一省之水軍不致廢弛  
有兩省勤操者則兩省不致廢弛自調兵調操兩事而外凡水  
營政務各督撫仍商之長江提督聽候主持

第九條核定疎防處分

一原奏第二十二條遇有劫盜案件即由長江提督專案參辦

而未將處分詳細聲明查武職疎防搶劫案件向例查明離汛里數分別參處有五里以內五里以外之分又有專汛協防兼轄統轄之別今長江水師分布江面自都司守備以下卽以座船爲衙署本應隨時上下梭巡不能指定汛地五里之起訖確在何處擬以哨官爲專汛之官營官爲本轄之官遇有搶劫案件專汛哨官係何職名應由該營官指出初參仍照定例四月限滿題參疎防專汛官住俸本轄官罰俸六箇月二三四等參向例一年限期者酌量加重改爲各予限八箇月二參限滿專汛官降一級留任本轄官罰俸一年三參限滿專汛官加重降二級留任四參限滿專汛官加重降二級調用不准抵銷如汛



守內有一夜連劫數次情事仍照舊例俟三箇月限滿犯無弋獲卽將專汛官降二級調用本轄者降二級留任毋庸立協防外委名目亦毋庸議統轄官之處分倘能於限內獲犯過半兼獲盜首均准免其參處遵照原奏由提督查明隨時專案參辦如提督遲不開參卽由督撫參奏以示江面劫案較陸路尤爲慎重又有應酌議者水師處分旣已加重則江中漁船應概歸水師稽查管轄向來江中水盜均以漁船爲窩藏出沒之所嗣後魚稅仍歸州縣經收漁船則歸水師編查以清盜源而一事權

第十條各營輪流更調

一水師所重者以船爲家不准登岸居住若永遠駐紮一處則經年累月戰船全不移動必致廢弛朽壞相率私造屋宇棄舟楫而住室廬不可不防其漸茲定江楚各營每逢半年更調一次副將與副將之營互調參將與參將之營互調游擊與游擊之營互調每營調居客汛二次駐紮一年又准調回本汛一次駐紮半年其互調之或遠或近聽提督隨時斟酌總不令其廢弛安逸依戀陸居而已惟哨官之有疎防處分者不准調動以杜規避

陸營借補小缺請飭部核議片

同治七年三月初五日

再武職各官大銜借補小缺臣於六年五月十五日具奏欽奉諭旨允准在案嗣准部咨以同一軍營出力官職大者補缺之途太廣官職小者補缺反致無所不足以服軍心而作士氣仍應照章議駁等因咨會前來臣等此次奏補長江水師各缺甚至以提鎮之銜而借補千把之缺未免駭人聽聞然勇丁出身入營之資格極久列保之次數較多而家中貧寒如故情願補一小缺爲終身衣食之資此亦人之常情臣等既不忍拂其意而又取其入伍多年可收駕輕就熟之效伏乞皇上敕下該部議准以從衆願仍遵照兵部原議將來此項人

員用竣不准再行借補以示限制至陸路人員臣近來奏咨大  
銜借補小缺者均經兵部議駁在兵部之意一則恐銜缺懸殊  
名實不符或有礙於體制一則恐千把微員永無升階或屈抑  
乎人才此等苦心臣亦能曲體而深亮之惟查軍興十餘年凡  
綠營弁兵略有才力膽識無不奮迹行閒但有僥倖優保者斷  
無屈抑未保者是人才本無沈淪之患若慮未弁永無升階則  
請暫於此二十年內准以大銜借補小缺截至同治二十七年  
爲止以後仍照舊例按班序補亦卽兵部所云此項人員用竣  
不再借補之意也至於名實不符有礙體制之說查崇階而退  
居小缺在補缺者已覺得不償失在獎功者尙恐賞不酬勞上

下雖不滿意究無損於政體若崇階而永無補期則功績最淺者轉得各占實缺勞苦最久者反致長抱虛榮是缺望更深所損更大矣統計各省軍營保至武職三品以上者不下數萬人將來軍事大定各路撤兵此項有階無缺之員難保不滋生事端同治三年沈葆楨奏請安置此項人員自提鎮至都守均照實缺之例給與俸銀米石

諭旨頗以爲然飭令臣等核議臣以糜費太鉅未經議准若大銜借補小缺則毫無糜費雖不能安置多員而要可略安望缺者之心相應奏明請

旨將陸營借補小缺一案一併飭部核議如蒙議准臣等仍隨

時察看或每年將借補者酌補六七成序補者酌補三四成總期衆志交孚不虞偏廢理合附片陳請伏乞

皇太后

皇上聖鑒訓示謹

奏

六年江北冬漕併歸海運詳議章程摺

同治七年三月初五日

奏爲同治六年江北冬漕併歸海運詳議辦理章程恭摺仰祈  
聖鑒事竊照江北淮揚通三屬同治六年分徵解實數籌辦情  
形業經臣等於六年十二月初三日專摺具奏在案嗣准部咨  
江北漕糧海運議令全用夾板船裝運等因伏查海運漕糧本  
以雇用沙船爲正辦此次江北漕米無多沙船大號可裝二千  
餘石者不過需用三十號小號可裝七八百石者亦不過需船  
七十餘號現已委員馳赴上海先儘沙船雇用如實不敷用或  
仍參用夾板船總期體察情形及時酌辦不致遺誤所有江北  
同治六年分漕糧除奏明撥抵兵糧外實計起運米五萬七千

三百餘石又高郵泰州寶應三州縣帶徵五年緩漕米二千四百餘石應隨同新漕一併起運共實該交倉漕糧正耗米五萬九千八百餘石計需沙船經剝食耗等米六千餘石又籌備二升餘米一千一百餘石應派江安督糧道王大經酌帶委員紳董先期赴津承辦交米事宜並由部臣屆時咨請

欽派大臣一併驗收以昭慎重此外應辦一切事宜業已分別次第舉行據江甯布政使李宗義江安督糧道王大經查照蘇屬海運成案參以江北情形悉心酌擬章程詳請具奏前來臣等復加酌核相應繕具清單恭呈御覽如有未盡事宜容隨時



奏明辦理所有<sub>臣</sub>等酌議海運章程緣由謹會同漕運總督<sub>臣</sub>  
張之萬江蘇巡撫<sub>臣</sub>丁日昌恭摺具奏伏乞

皇太后

皇上聖鑒訓示謹

奏

謹將江北淮揚通三屬同治六年分漕糧海運酌擬章程十條繕具清單恭呈

御覽

計開

一米色應挑選乾潔也江北淮揚一帶出產粳米無多從前兩屆河運均係紅白兼收粳秈並買此次改由海運仍當照辦遴派委員分投採購並令多辦粳米認真挑選乾潔不准稍有潮雜以重倉儲

一分定米數應畫一兌收也查同治六年分江北淮揚通三府州屬應徵熟田漕糧除

奏明撥抵兵糧外實該起運米五萬七千三百六十八石七斗  
四合六勺內正兌正米二萬八千七百二十石九斗八升八合  
六勺加三耗米八千五百四十三石四斗一升八合九勺改兌  
正米一萬六千三十八石三斗五升一合二勺加二五耗米四  
千三十三石八斗八升三勺加二二耗米三十二石六升五合  
六勺又高郵泰州寶應三州縣帶徵同治五年分緩漕米二千  
四百六十八石二斗五升一合九勺內正兌正米一千七百十  
七石一斗五升九合一勺加三耗米五百十五石一斗四升七  
合七勺改兌正米一百八十八石七斗五升六合一勺加二五  
耗米四十七石一斗八升九合以上共該起運交倉米五萬九

千八百三十六石九斗五升六合五勺查照向章按漕斛採買  
交倉亦歸漕斛現用部頒小口鐵斛製造木斛由糧道轉準發  
交買米各員應用仍令各備樣米俟交兌沙船時呈驗加貼印  
花連道庫鐵斛一並帶通較兌以歸畫一

一江北米數無多應從簡辦理也查蘇屬歷屆海運在蘇州設  
立省局由司道督辦委蘇州府總司其事並委首廳縣隨同辦  
理又在上海設立滬局委辦雇船驗兌各事宜此次江北漕糧  
改辦海運事屬創始然米祇六萬石當此經費支絀自應格外  
撙節由藩司糧道會同督辦毋庸設立省局所有雇船驗兌各  
事宜酌派委員會同蘇屬滬局員董妥爲經理毋須另設一局

以節糜費其天津交米事宜應派江安督糧道王大經酌帶員  
董馳赴天津經理交兌會同直隸委員妥辦

一江北漕米應雇沙船裝運也向來漕糧海運均用沙船歷著  
成效江北此次海運因上冬沙船隻甚少故前奏有參用夾  
板船之議現已委員赴滬先儘沙船雇用飭令挑選妥實商船  
責成同行互相結保編列號旗排泊浦江受兌放洋時准其二  
成載貨照案免稅咨明各關查照至由津回空販運北地貨物  
並准照案全行免稅該沙船倘遇有在洋遭風卽時報明所在  
地方官驗明除折桅鬆艙糧貨俱損

奏明豁免外如貨物並未拋棄獨棄官糧者雖鬆艙屬實仍令

賠補如果承運無誤並准援案分別給獎至回空沙船如往天津牛庄各口販貨應由局查明米石交清方准填給全行免稅印照持赴各關呈驗放行其交米不清之船一概不准給照以示區別以上俱指雇用沙船而言或參用夾板船隻另議章程咨明辦理

一耗餘等米應備帶本色也查海運章程天津剝船食米每漕米一石給米一升一合五勺通倉經紀耗米每石給米一升五合均以洪斛核計又每石備帶餘米二升隨正交倉又沙船耗米每石給米八升江北漕糧海運自應查照一律購齊本色解滬兌交隨正開報至沙船耗米一項原備到津或有折耗彌補

之用如有盈餘由官收買咸豐五年復議於此項耗米內限定提出三成由津局按照市價收買亦應照辦該船戶等於裝兌後不得私行糶變查出嚴究以裕倉儲

一水腳應照章核給也查歷屆海運雇用沙衛等船每裝米一石給水腳銀四錢上屆

奏准加給銀一錢五分連神福犒賞等共七款每石給銀五錢七分八釐一毫此次江北漕糧海運自應照辦俟船隻備齊核明應需銀數解由滬局兌收轉給以利遄行

一津通經費應核實開支也查海運章程天津官剝每百石給剝價雜費銀八兩四錢四分七釐三毫民剝每百石給銀九兩

八錢八分四釐八毫箇兒錢每百石給銀二兩江北此次海運均應照章辦理此外津通經費除輕齎席木銀兩由糧道衙門照例批解外其津局用項在津收買沙船餘米各款係屬創辦難以豫定擬仿照舊章寬爲籌備以免缺誤至沙船水腳及一切經費係在漕項本折及此次所買米價盈餘款內抵支如有不敷仍應由司籌撥事竣分別造冊核實報銷如果委員辦理無誤准其援案請獎俾示鼓勵

一米船放洋應責成巡護也查歷屆海運舊章准令沙船各帶礮械出口給領入口呈繳於放洋時由捕盜局派令員董選撥輪勇各船出洋護送一面責成沿海水師鎮將多派備弁兵船



在於所轄各島嚴密巡防逐段迎護催僨趕速抵津並先咨明直隸山東各督撫臣一體分飭護送開具專任分任各職名送部查考以昭慎重

一米船交清應責成經紀也查歷屆海運均經戶部奏請

欽派大臣赴津查驗並由倉場侍郎揀派坐糧廳酌帶經紀斛手直隸總督派委天津道總辦在案江北此次海運應請照案屆時仍由各衙門奏請

欽派並請於米船抵津時隨到隨驗除實有霉變應立時風晾外如係乾潔之米務須隨驗隨收至已交之米由津運通由通運倉應照戶部奏定章程責成經紀承管如有偷漏潮溼攙和

等弊責令賠補究治不得牽涉原裝沙船以免羈候而示體恤  
一餘米應循案抵補也查歷屆海運遇有沙船在洋遭風失事  
及霉變遲到等米均以本屆籌備餘米並上屆存倉米數抵補  
交足具報全完續到米船由天津道驗運交倉另檔存記留抵  
下屆正供之用歷經循辦有案此次應請照辦以速正運

擬赴上海查閱鐵廠片 同治七年四月初七日

再江南外海水師向設戰船一百七十一號道光二十四年前  
任兩江督臣璧昌奏稱一概朽爛漂蕩無存彼時雖奏請減船  
加工另行修造而其費出於攤捐故其船成者極少咸豐三年  
兵燹以後燬廢殆盡近年洋面不靖屢有劫案亟應規復水師  
出洋捕剿惟外洋開仗較之長江開仗其難數倍臣往年所用  
之長龍舢板均不便於出洋現於上海鐵廠製造輪船又於蕪  
湖等處試造廣東艇船俟船成之後仍須酌改營制略仿西洋  
之法一船設一專官乃可角逐海上日起有功查上海吳淞口  
出江入海華洋雲集商船輻輳尤爲盜蹤出沒之所臣擬於近

日親至上海一行會同撫臣丁日昌周厯履勘博詢洋面戰爭之道細查鐵廠製造之工再行酌議外海水師章程會核具奏所有臣衙門日行公事照例由藩司代拆代行理合附片陳明伏乞

皇太后

皇上聖鑒謹

奏

遵 旨酌提制錢解津摺

同治七年閏四月十四日

奏爲遵

旨酌提制錢解津謹將大概情形恭摺由驛覆奏仰祈

聖鑒事竊臣等承准軍機大臣密寄同治六年十一月初五日奉

上諭戶部奏請飭濱臨江海各省解錢籌銅一摺前因銅斤缺乏鼓鑄當十大錢原爲一時權宜之計行之日久不無流弊近來市廛行使暗中折減於國用民生均有未便惟欲規復圜法必須籌備制錢京師自通行大錢以來所有制錢大都運往外省若欲鼓鑄新錢又非一二年所能驟復戶部議令濱臨江海

各省籌解制錢實爲便捷之法前經譚廷襄函商湖北督撫擬於鹽釐項下酌提制錢由輪船運津據稱事屬可行此外如江西江蘇浙江廣東四省均有海船可通各該省釐金較旺自可一律提解著曾國藩郭柏蔭英翰馬新貽瑞麟蔣益澧李瀚章何璟劉坤一各於鹽卡釐卡收款內每年酌提制錢三十萬串由輪船裝運天津交崇厚擇地嚴密收存聽候提用酌提錢文准照銀價劃抵應解京餉其制錢一千台銀若干及運腳若干卽著各該督撫迅速議定具奏所提之錢務須年清年款以兩年爲止不准稍有短解此項錢文卽名爲天津練餉以昭愼密不可稍有宣露致令外來商民傳播都城有礙錢法是爲至要

其湖北施宜等處向多銅礦著該督撫飭屬招商試辦酌抽礦稅試行有效卽籌款收買商銅以裕鼓鑄並著妥議章程具奏至濱海商賈向有販運紅銅條銅等項應如何招商收買之處並著各該督撫三口通商大臣妥速議奏等因欽此當經轉飭司道欽遵籌議伏查理財之道全在酌盈劑虛

京師爲首善之區錢法尤民生所繫今因大錢相率折減亟須調劑均平臣等忝任疆圉必應公同籌畫惟查制錢一項蘇省軍興以後因滇銅采辦維艱業已停鑄多年現在市肆所有錢文均係就地周轉散而不聚亦鮮有徙而之他者所收鹽釐貨釐雖以錢數入冊實則紋銀與洋錢兩項折算者多且撥充軍

餉等項均係易銀批解是以民用未形不足若遽以數十萬串提運出省則錢少價昂小民衣食之需勢必漸臻騰貴實亦不可不防臣等往復籌商竊以應解京餉以兩淮上海爲最且鹽釐均在兩淮貨釐半在上海地之相去幾及千里分路籌出則不見其多按季解交則不形其驟擬由兩淮運司蘇松太道本年各解錢十五萬串分作四季勻解如錢款不敷卽由司關隨時與釐局兌換以免市僧居奇至銀錢市價低昂不一現在每錢一千約易銀六錢有零將來起運時長落尙難預定所有自滬至津輪船水腳保險以及麻袋繩索捆紮辛工每錢百千約需銀六兩有零加以押運委員薪水川資及到津駁運挑力等



項每次約銀二百餘兩其由兩淮解至上海轉解者尙須加給水腳等項應俟起解時分別給發統在應解京餉項下開支事竣彙計銀數核實造報卽以抵作奉撥京餉另行

奏咨俟運足三十萬串如錢價不致過昂民用亦無窒礙仍當酌量情形接續起解仰懇

宸廑如因運解過多錢價驟增卽當奏明下年少解數成期於中外通籌無畸重畸輕之弊此項錢文謹遵

諭旨名爲天津練餉以昭慎密至紅銅條銅大半產自外洋蘇省從前鼓鑄之時係由官民兩商自備船隻采辦洋銅現在東洋各貨悉聽泰西各國運行銅商無利可圖以致華人望而卻

步應如何招商收買變通辦理已飭司道體察情形確切籌計俟辦有眉目再當另行核

奏除飭司道將解錢日期呈報分咨外合將遵辦緣由恭摺由驛覆陳伏乞

皇太后

皇上聖鑒訓示再此案久擬覆奏臣國藩因有會查海口之舉寄信與臣日昌面商定奪頃臣國藩於初三日至蘇州初七日會查太湖十一日同來上海議定一切是以覆奏稍遲合併聲明謹

奏

直隸陝甘協餉分別籌辦摺

同治七年閏四月十四日

奏爲奉撥直隸軍餉先行酌數籌濟並將近年協撥陝甘軍餉情形彙摺覆陳仰祈

聖鑒事竊<sub>臣</sub>等承准軍機大臣字寄同治七年二月二十八日奉

上諭官文奏請飭各省協撥軍餉一摺捻匪竄擾直境將及兩月各省官軍雲集爲數幾及十萬雖餉需未必盡資於直省而各軍隨帶餉銀用盡卽須由直隸接濟糧米柴草亦須籌備直境上年被旱被擾民間蓋藏空虛購辦之費較鉅亟應寬爲儲備著湖南湖北江西江蘇廣東福建各督撫速於捐輸鹽釐並

華洋關稅項下無論何款每省各撥助餉銀十萬兩剋期由海道輪船解赴天津交崇厚驗收卽由崇厚轉解保定交官文應用以期迅速等因欽此又奉三月二十八日

寄諭穆圖善奏請飭江南等省撥解甘餉各摺片覽奏均悉江南等省欠解甘餉甚多著曾國藩丁日昌將上年七月以前應撥甘餉如數迅解等因欽此又奉四月初七日

寄諭劉典奏請催原撥廣東江蘇協餉各摺片陝省軍務方殷待餉孔亟前經諭令閩海粵海江漢等關於四成洋稅內各按月撥解銀一萬兩又原撥廣東江蘇兩省協餉按月一萬兩乃廣東等省撥解寥寥設因餉需不繼兵勇譁潰於大局甚有關

繫江蘇月協陝餉著丁日昌就近派委道員胡光墉按月催領起運并著留國藩瑞麟丁日昌將前欠陝省協餉迅卽籌款如數分起補解仍按月源源籌解以資接濟等因欽此均經轉行欽遵在案伏查捻氛竄擾直境大兵雲集需餉浩繁臣等忝膺疆寄分應協力圖維以期餉足兵精迅殲醜類是以臣等正月間一聞捻匪北竄之信卽迅籌糧餉軍火陸路由清江轉運水路由天津轉運源源解俾前敵淮湘各營軍士安心追剿又籌銀七萬兩並提前預解固本京餉三萬五百兩統計十萬五百兩委員裝搭輪船迅速赴津分別解交總理衙門戶部轉解神機營俾資杯水之助茲奉

飭籌官文軍餉何敢稍有歧視惟江蘇自用兵以後連年出款極鉅已成强弩之末臣曾國藩臣李鴻章先後統師北征餉源皆取給於江蘇去年李鴻章剿平東捻任賴一股所有軍火賞卹轉運各款尤爲繁重蓋緣道路愈遠征戰愈苦則費用愈繁兼之提督劉松山一軍向由江蘇供支自到直隸後運費日增臣張之萬清淮一軍現調至黃河以北亦由江蘇協濟提督黃翼升淮揚水師一軍現調至張秋以北亦由江蘇支應是現在直隸山東剿賊之兵大半出自江蘇之餉較之他省略供前敵之餉與全未供前敵之餉者緩急情形迥不相同加以本省旗綠各營之兵餉洋槍隊及水師之勇糧湖北靈峻等營之協

餉款目浩繁亦爲各省所未有江蘇釐金昔年收數甚旺近來輪船夾板分我江海之利華商本小利薄逐漸停歇稅釐日形短絀臣等久思將各局卡分別裁撤歸併以甦商困而支用太繁未敢輕議更張入款日減出款反增實屬力盡筋疲不敷周轉惟是

畿輔需餉無論如何爲難敢不稍竭微忱臣等公同熟商擬籌湊二萬兩委員解赴天津交三口通商大臣崇厚驗收轉解其餘銀兩能否續解仍俟察看前敵情形再行酌量辦理至江蘇協甘軍餉三萬兩向在金陵釐捐撥解同治六年四五六共三箇月應協之餉經臣國藩

奏明以一萬兩解陝西以二萬兩解甘肅早經報解清楚七月以後陝甘督臣左宗棠有洋商借款在於江海關因劃抵扣至十二月止計借款十八萬兩亦已抵解完竣七年協甘之餉每月以二萬兩解左宗棠軍營以一萬兩解穆圖善軍營左營則解現銀者三箇月抵借款者十箇月穆營則全解現銀臣國藩於上年十二月初三日本年三月初五日兩次奏明在案刻下正二三四等月業已解清並無短欠穆圖善所稱欠解之處或係未知上年協餉全歸左營本年協餉尙在途次乎至劉典所奏江蘇應協陝餉一萬兩卽係戶部議覆喬松年洋稅摺內所指之款此項協陝萬金當初本無確定之案是以臣國藩六年



三月二十日奏撥陝餉卽在月協甘餉三萬之內酌抽一萬解陝解滿三月卽行停止目下江蘇支絀如此卽有額協定款亦應奏明停解况陝西本無定案自應俟直隸肅清淮軍漸撤乃可另議協秦之法所有直隸陝甘協餉分別籌辦情形謹合詞恭摺覆陳伏乞

皇太后

皇上聖鑒訓示謹

奏

催劉銘傳赴營密片

同治七年閏四月十四日

再臣國藩前經奏明赴滬察看海口閱視鐵廠初四日蘇州途次接奉四月二十五日

寄諭前因劉銘傳勦賊較爲出力且三月假期已滿是以諭令李鴻章傳諭該提督迅赴直隸山東一帶勦賊茲據李鴻章奏稱已兩次手書傳令到營襄助曾國藩亦爲懇切留催等語劉銘傳受朝廷不次之擢任重專閫邇來捻勢披猖自應奮勇誓師滅此朝食以圖報稱且三月假期已滿骸疾諒已全愈豈可藉病推諉自耽安逸現在捻逆逼處黃運之交各路大兵已集機會大有可乘李鴻章旣稱劉銘傳熟悉捻情卽著再行飛催

銷假迅速到營不准片刻稽延致誤軍事并著曾國藩吳坤修就近催令啟行銘軍啟行時如有應需款項著曾國藩代籌助給以利遄行等因欽此臣一面咨會劉銘傳一面專弁齎函乘坐輪船由上海至裕溪口登陸馳赴合肥催令啟行臣查上年秋冬運河之守任柱之戮其謀皆自劉銘傳發之追賊之速打仗之勇亦以劉銘傳爲最而勞苦疲乏亦惟銘軍獨甚是以九月十月間卽與李鴻章訂約一俟東捻就平便當回籍調理厥後剿滅任賴股匪卽行請假馳歸以踐前約其時張總愚一股業已渡黃竄晉李鴻章欲強留劉銘傳同剿西股不令回籍劉銘傳怨李鴻章忽背前約又疑其論功一疏僅與諸將平列未能

特筆表其謀略心中頗懷鬱鬱其實李鴻章背約之故係因西股已入直隸不能不改變前說而銘軍之善謀苦戰宜予休息李鴻章別有密片表之特劉銘傳未之知耳該提督到籍一月之後李鴻章疊次專弁持函催促臣與丁日昌亦馳函懇切催之又因病體未愈不耐鞍馬尙未啟行此次欽奉

諭旨飭催該提督自必迅速就道惟念張逆縱橫畿輔將近半年各軍均極疲乏若非去年先滅任賴一股大局不堪設想劉銘傳既有偉績於前又將策成效於後將來到營之日籲懇天恩於

寄諭各帥臣之便將該提督計謀之臧追勦之苦偶一傳諭及

之則

天語一字之褒勝於李鴻章屢疏之薦屢牘之催萬萬矣銘軍  
應需款項自當設法籌給以期迅奏膚公仰慰

宸廑所有臣藩遵

旨催令劉銘傳赴營緣由理合附片復奏並將其中細情據實  
密陳伏乞

皇太后

皇上聖鑒訓示謹

奏

刊給勇經費摺 同治七年七月二十二日

奏爲預籌撤勇經費恭摺仰祈

聖鑒事竊兩湖督臣李鴻章統帥剿捻所部淮軍馬步水師五

萬餘人暨劉松山老湘營一軍皆由蘇省供支自乙丑至今已

閱四年悉索轉輸不遺餘力今幸仰託

聖主威福東西捻股一律肅清亟應趕緊裁撤以節餉需而蘇

民力惟蘇省按月應用之餉本係各指各款毫無贏餘本年上

半年撥款更有出於指定款項之外者如撫臣丁日昌兩次籌

解神機營銀十一萬兩運河馬棚灣堤工用錢十三萬餘串均

係騰挪籌撥各台庫移借一空聞四月間因周轉不敷曾咨商

浙江撫臣借銀十萬兩以應急需預計下半年應用之款又有出於指定款項之外者如戶部指撥陝西每月銀一萬兩前以西捻未平尙難籌解撫臣劉典函商臣處臣允以捻股蕩平必當籌濟此後自不能不按月協解又如裏下河民田以運河東西兩堤爲保障現在勘估小羅堡一段工程約須錢十餘萬串亦屬必不可緩之款蘇省餉源以釐捐爲大宗閏四月間臣至上海商民稟求減釐業已飭局量予裁減六月初因苦雨爲災蘇民環跪訴求免釐又經撫臣將鋪捐釐金裁免入款既有所減出款轉有所增若欲再籌巨款爲撤勇之資更屬力有未逮臣等往返商本思向洋商借銀五十萬兩因利銀太多而中

謝授武英殿大學士

恩摺

同治七年五月初八日

奏爲恭謝

天恩仰祈

聖鑒事竊

臣准吏部咨開同治七年四月二十四日內閣奉

上諭曾國藩著授爲武英殿大學士欽此當卽恭設香案望

闕叩頭謝

恩訖伏念

臣謬居揆席兼領封圻愧無尺寸之功祇切滿盈之

懼茲乃欽承

恩命忝長班行溯通籍於三十年前未預纂修之役拜

新命於



九重天上適承遭遇之隆就詞館而論班資同朝尙多先達以疆臣而登台輔從古託爲殊榮自顧顓蒙倍深悚惕當此寇氛猶警民力未紓臣惟當盡瘁鞠躬習勤補拙恤疲氓以培元氣求賢士以集眾思常履薄而臨深冀盡忠而補過庶幾仰荅高厚鴻慈於萬一所有微臣感激下忱謹繕摺叩謝天恩伏乞

皇太后

皇上聖鑒謹

奏

國屢借洋銀亦屬疆臣之恥惟有向浙江江西湖北等省暫時  
挪借尙可設法通融查前借浙江銀十萬兩或作協款或作借  
款本擬秋閒定議具奏而目前情形不特前款無可籌還並須  
續行添借江西省供應霆軍兩年來按月撥解已逾百數十萬  
撫臣劉坤一力顧大局臣方時以爲款本不欲作盡忠竭歡之  
舉而目下需用甚亟不得不再商籌借湖北本年境內無事養  
兵極少又係臣李鴻章本轄之境自可緩急相通合無籲懇  
天恩敕下浙江江西兩撫臣各借銀二十萬兩湖北借銀十萬  
兩撥解臣處爲遣撤淮湘各軍之用仍由蘇省於四箇月以後  
陸續歸款浙江之款則由松滬釐局解還江西之款則由西鹽

督銷局解還湖北之款則由鄂鹽督銷局解還或李鴻章履任後酌量籌辦一轉移間蘇省之力稍紓而三省亦尙無所損至閏四月間所借浙江之十萬兩更無餘力籌還應請

旨飭下浙江撫臣作爲協蘇之款將來卽由浙江歸入軍需報銷以省輾轉所有預籌撤勇經費緣由理合會同兩湖督臣李鴻章江蘇撫臣丁日昌恭摺馳陳伏乞

皇太后

皇上聖鑒訓示謹

奏

查明運河水誌情形摺

同治七年七月二十二日

奏爲遵

旨查明運河水誌情形恭摺覆陳仰祈

聖鑒事竊臣等承准軍機大臣字寄同治七年閏四月初六日奉

上諭都察院奏江蘇舉人蔡則灃等遣抱以壩水頻年被淹請復舊誌等詞赴該衙門呈訴據稱現在改誌原爲保堤而設但運河存水常行在一丈以外今減爲一丈四尺勢必連年開壩民力均屬拋荒仍請水誌遵行一丈六尺立秋後始准開車邏壩處警後始准開中新等壩成案等語該舉人等所稱各情應

如何因時制宜仍復舊案以衛民生之處著曾國藩張之萬丁  
日昌悉心會商妥爲辦理原呈均著鈔給閱看等因欽此伏查  
運河水誌前經臣之萬會同前署督臣李鴻章參酌成案議定  
立秋節前高郵誌椿長至一丈四尺啓放車邏壩仍每加四寸  
遞行接啓南中新壩如逾立秋則照一丈二尺八寸按章遞啓  
等因於五年十一月初十日奏明在案茲據舉人蔡則灃等呈  
請仍復誌椿舊案查呈內所稱舊案有水誌一丈六尺始行開  
壩之說督臣衙門案卷全失無可稽考飭據淮揚道鈔錄成案  
前後參觀並無水誌以一丈六尺爲度之說自係該舉人等得  
自傳述並非有案可稽至所請立秋處暑節後始行開壩一節

查各壩遲開一日則下河受益一日自是正辦然水勢長落每  
年遲早不同若必待立秋以後且必限定誌椿一丈六尺始放  
車邏壩萬一盛漲潰決則運河之啓壩稍遲下河之受害更大  
且誌椿尺寸雖經奏定臣等總以得守且守督飭工員細心體  
察斷無專顧堤工急於開壩之事查五年奏定章程以後六年  
七月十五日始開車邏壩已在立秋之後本年水勢較小現在  
處暑已逾半月並未開放各壩如果他年並無異常盛漲則終  
歲不必開壩更爲盡善總之裏下河之居民以運河之兩堤爲  
命脈十餘年來久未興修險工林立本年春間撥錢十餘萬串  
派員將最險之馬棚灣一段修整九月閒尙擬籌款續修小羅

堡一段擬於二三年內將東西兩堤全行修築務期格外高厚  
堅實能使水誌過於一丈四尺尙不開壩則捍衛有資保全更  
大臣等愚見以爲隄工加一分則裏下河受一分之益若徒爭  
開壩之尺寸較時日之早遲則放壩之際浩瀚奔注立成澤國  
雖比諸潰決之禍稍輕而其有傷於農田則一也五年奏定之  
案甫經二年行之無弊未便遽議更張該舉人蔡則灃呈請改  
定誌椿尺寸之處應毋庸議所有臣等遵  
旨查覆緣由理合恭摺具陳伏乞

皇太后

皇上聖鑒訓示謹

奏